

植物名實圖考長編

三十一

橙

嘉祐本草橙子皮味苦辛溫作醬醋香美散腸胃惡氣消食去胃中浮風氣其瓢味酸去惡心不可多食傷肝氣又以瓢洗去酸汁細切和鹽蜜煎成貯食之去胃中浮風其樹亦似橘樹而葉大其形圓大於橘而香皮厚而皺八月熟

本草衍義橙子皮今人止以爲果或取皮合湯待賓未見入藥宿酒未解食之速醒

韓彥直橘錄橙子木有刺似朱欒而小永嘉植之不若古栝之盛比年始競有之經霜早黃膚澤可愛狀微有似真柑但圓正

細實非真柑比人喜把翫之香氣馥馥可以熏袖可以茗鮮可以漬蜜真嘉實也若真相則無是二三者人自珍之得非瞭然在人耳目者蓋真柑之細耶

爾雅翼橙之芳用在皮柑之甘在瓢其木似橘其葉中細如蜂腰其實稍早橙之黃時橘方尙綠其形圓大於橘而香皮厚而皺乃正黃色不若甘橘之帶赤也本草云其皮苦辛作酢醬香美蓋獨宜爲和故張景陽七命云燁以秋橙醑以春梅

福州府志物產橙有佛頭橙蜜橙青橙雛橙欒橙香綿橙

荔枝

嘉祐本草荔枝子味甘平無毒止渴益人顏色生嶺南及巴中其樹高一二丈葉青茂凌冬不凋實如松子大殼皺若紅羅紋肉青白若水精甘美如蜜四五月熟百鳥食之皆肥矣

圖經荔枝子生嶺南及巴中今泉福漳嘉蜀渝涪州興化軍及二廣州郡皆有之其品閩中第一蜀川次之嶺南爲下扶南記云此木以荔枝爲名者以其結實時枝弱而蒂牢不可摘取以刀斧剗取其枝故以爲名耳其木高二三丈自徑尺至於合抱頗類桂木冬青之屬葉蓬蓬然四時榮茂不凋其木性至堅勁

土人取其根作阮咸槽及彈碁局木之大者子至百斛其花青
白狀若冠之蕤纓實如松毬之初生者殼若羅文初青漸紅肉
淡白如肪玉味甘而多汁五六月盛熟時彼方皆燕會其下以
賞之賓主極量取噉雖多亦不傷人少過度則飲蜜漿一盃便
解荔枝始傳於漢世初惟出嶺南後出蜀中蜀都賦所云旁挺
龍目側生荔枝是也蜀中之品在唐尤盛白居易圖序論之詳
矣今閩中四郡所出特奇而種類盛至三十餘品皮肉甚厚甘
香瑩白非廣蜀之比也福唐歲貢白曝荔枝並蜜煎荔枝肉俱
爲上方之珍菓白曝須佳實乃堪其市貨者多用雜色荔枝入

鹽梅暴之成而皮深紅味亦少酸殊失本真凡經暴則可經歲好者寄至都下及關陝河外諸處味猶不歇百果貨市之盛皆不及此又有焦核荔枝味更甜美或云是木生背陽結實不完就者白暴之尤佳又有綠色蠟色皆其品之奇者本土亦自難得其蜀嶺荔枝初生亦小酢肉薄不堪暴花根亦入藥崔元亮海上方治喉痺腫痛以荔枝花并根共十二分以水三升煮去滓汁細細含嚥取瘥止

南方草木狀荔枝樹高五六丈餘如桂樹綠葉蓬蓬冬夏榮茂青華朱實實大如雞子核黃黑似熟蓮子實白如肪甘而多汁

似安石榴有甜酢者至日將中翕然俱赤則可食也一樹下子百斛


齊民要術廣志曰荔枝樹高五六丈如桂樹綠葉蓬蓬冬夏鬱茂青華朱實實大如雞子核黃黑似熟蓮子實白如肪甘而多汁似安石榴有甜酢者夏至日將已時翕然俱赤則可食也一樹下子百斛犍爲犍道南廣荔枝熟時百鳥肥其名上曰焦核小次曰春花次曰胡偈此三種爲美似鼈卵大而酸以爲醢和率生稻田間異物志曰荔枝爲果多汁味甘絕口又小酸所以成其味可飽食不可使厭生時大如雞子其膚光澤皮中實乾

則焦小其肌核不如生時奇四月始熟也

華陽國志江州有荔枝園寰宇記樂溫縣產荔枝其味猶勝諸
嶺涪州城西五十里唐時有妃子園中有荔枝百餘株顆肥爲
楊妃所喜當時以馬馳載七日夜至京人馬多斃然荔枝叙瀘
之品爲上涪州次之合州又次之今止嘉定州有數株餘州少
有植者

又荔枝叙州府出土人善爲荔枝煎可以致遠蜀都賦注南裔
志云荔枝出南康縣犍道縣唐志戎州貢荔枝煎元和志犍道
出荔枝一樹可收五十斗寰宇記犍道有荔枝園犍僮多以此

爲業園植萬株唐白居易荔枝圖序荔枝生巴峽間樹形團團
如帷蓋葉如冬青花如橘而春榮實如丹而夏熟朶如蒲桃核
如枇杷殼如紅繒膜如紫綃瓢肉潔白如冰雪漿液甘酸如醴
酪蔡襄荔枝譜蜀所出早熟而肉薄味甘酸



附蔡襄荔枝譜 全

第一

荔枝之於天下唯閩粵南粵巴蜀有之漢初南粵王尉佗以之
備方物於是始通中國司馬相如賦上林云蒼逕離支蓋夸言
之無有是也東京交趾七郡貢生荔枝十里一置五里一堠晝
夜奔騰有毒蟲猛獸之害臨武長唐羌上書言狀和帝詔太官
省之魏文帝有西域蒲桃之比世譏其謬論豈當時南北斷隔
所擬出於傳聞耶唐天寶中妃子尤愛嗜涪州歲命驛致時之
詞人多所稱詠張九齡賦之以託意白居易刺忠州旣形於詩

又圖而序之雖髣髴顏色而甘滋之勝莫能著也洛陽取於嶺南長安來於巴蜀雖曰鮮獻而傳置之速腐爛之餘色香味之存者亡幾矣是生荔枝中國未始見之也九齡居易雖見新實驗今之廣南州郡與夔梓之間所出大率早熟肌肉薄而味甘酸其精好者僅比東閩之下等是二人者亦未始遇夫真荔枝者也閩中唯四郡有之福州最多而興化軍最爲奇特泉漳時亦知名列品雖高而寂寥無紀將尤異之物昔所未有乎蓋亦有之而未始遇乎人也予家莆陽再臨泉福二郡十年往還道由鄉國每得其尤者命工寫生稊集旣多因而題目以爲倡始

夫以一木之實生於海濱巖險之遠而能名徹上京重於當世是亦有足貴者其於果品卓然第一然性畏高寒不堪移殖而又道理遼絕曾不得班於盧橘江橙之右少發光彩此所以爲之嘆惜而不可不述也

第二

興化軍風俗園池勝處唯種荔枝當其熟時雖有他果不復見省尤重陳紫富室大家歲或不嘗雖別品千計不爲滿意陳氏欲采摘必先閉戶隔牆入錢度錢與之得者自以爲幸不敢較其直之多少也列陳紫之所長以例衆品其樹晚熟其實廣上

而圓下大可徑寸有五分香氣清遠色澤鮮紫殼薄而平瓢厚而瑩膜如桃花紅核如丁香母剝之凝如水精食之消如絳雪其味之至不可得而狀也荔枝以甘爲味雖百千樹莫有同者過甘與淡失味之中唯陳紫之於色香味自拔其類此所爲天下第一也凡荔枝皮膜形色一二有類陳紫則已爲中品若夫厚皮尖刺肌理黃色附核而赤食之有渣食已而澀雖無酢味自亦下等矣

第三

福州種殖最多延馳原野洪塘水西尤其盛處一家之有至於

萬株城中越山當州署之北鬱爲林麓暑雨初霽晚日照曜絳
囊翠葉鮮明蔽映數里之間焜如星火非名畫之可得而精思
之可述觀攬之勝無比初著花時商人計林斷之以立券若後
豐寡商人知之不計美惡悉爲紅鹽者水浮陸轉以入京師外
至北戎西夏東南舟行新羅日本琉球大食之屬莫不愛好重
利以酬之故商人販益廣而鄉人種益多一歲之出不知幾千
萬億而鄉人得飲食者蓋鮮以其斷林鬻之也品目至衆唯江
家綠爲州之第一

第四

荔枝食之有益於人列仙傳稱有食其華實爲荔枝仙人本草亦列其功葛洪云蠲渴補髓所以唐羌疏曰未必延年益壽蓋云雖有其傳豈果能哉亦諫止之詞也或以其性熱人有甘噉千顆未嘗爲疾卽少覺熱以蜜漿解之其木堅理難老今有三百歲者枝葉繁茂生結不怠此亦其驗也

第五

初種畏寒方五六年深冬覆之以護霜霰福州之西三舍曰水口地少加寒已不可殖大畧其花春生赭赭然白色其花多少在風雨時與不時也有間歲生者謂之歇枝有仍歲生者半生

半歇也春雨之際旁生新葉其色紅白六七月時色已變綠此
明年開花者也今年實者明年歇枝也最忌麝香或遇之花實
盡落其熟未經採摘蟲鳥皆不敢近或已取之蝙蝠蜂蟻爭來
蠹食園家有名樹旁植四柱小樓夜棲其上以警盜者又破竹
五七尺搖之蒼蒼然以逼蝙蝠之屬

第六

紅鹽之法民間以鹽梅滷浸佛桑花爲紅漿投荔枝漬之曝乾
色紅而甘酸可三四年不蟲修貢與商人皆便之然絕無正味
白曬者正爾烈日乾之以核堅爲止畜之甕中密封百日謂之

出汗去汗耐久不然踰歲壞矣福州舊貢紅鹽蜜煎二種慶厯初太官問歲取之狀知州事沈邈以道遠不可致減紅鹽之數而增白曬者兼令漳泉二郡亦均貢焉蜜煎剝生荔枝筴去其漿然後蜜煎之予前知福州用曬及半乾者爲煎色黃白而味美可愛其費荔枝減常歲十之六七然修貢者取之於民後之主吏利其多取之責賂曬煎之法不行矣

第七

陳紫已下十二品有等次
虎皮已下二十品無等次

陳紫因治居第平窳坎而樹之或云厥土肥沃之故今傳其種子者皆擇善壤終莫能及是亦賦生之異也